


說部叢書第三
集第四十五編

綠光

下冊

上海商務印
書館發行



中國圖書公司 和記出版

傑克航海記

一冊 二角

是書敘某哲學家。素持
思想乖僻。其子秉乃父
益迂謬。人多非笑之。
己權界。侵奪他人所有
主義所應爾。卒至世界
容足。於是遺世浮海。
在刺譏。詼諧處殊能發

(48)

中華民國七年五月初版

(綠) 光二冊

(每部定價大洋伍角)
(外埠酌加運費匯費)

編纂者 張 毅 漢

發行者 商務印書館

印刷所 商務印書館

總發行所 商務印書館

分售處 商務印書館

北京天津保定奉天吉林龍江濟南東昌
太原開封洛陽西安南京杭州蘭州吳興
安慶蕪湖南昌九江漢口武昌長沙貴陽
常德衡州成都重慶達縣福州廈門廣州
潮州 香港 桂林 梧州 雲南 貴陽
張家口 哈爾濱 新加坡

★此書有著作權翻印必究★

綠光下冊

第九章

歸途中。吾二人論述適者發見之事。皆謂盜犬之人。決非常盜。老將軍立陽臺上。遙盼我等。我等所從歸之道。則海濱之徑也。吾趨前語以嘉耐史克之意。及訪察所得將軍意大動。戚然曰。老夫生長於斯。從無奇異。而今竟出此怖人之事。則生牢竊想不及者也。天乎。茲事大惡。乃不類人世間。吾惟默禱於天。求其速了。還我往跡。安適。吾曰。幸得明練如嘉耐史克君者。假手爲助。所趨乃非歧途。不日且許奸破覆。今雖未知囂爾吐何在。而生存未死則可決。此可爲媚拉告慰者。將軍曰。陷第雖爲人盜。載之以舟而去。至其生死及他事。又安從悉者。以嘉耐史克君之調徵。召以舟載之深潭。投而溺之耳。吾曰。渠果欲死犬者。何勞斷其項。同之

牌。著聲固欲得生犬。利其項環。可挽以手引之行。又懼項牌爲人察覺。故斷而棄之。於此可見犬之非惟尙生。且能行矣。嘉耐史克君之說不謬。若得盜犬之人。則媚拉失明之由。亦不難迎刃而解。老將軍曰。大異大異。若能揣知彼將犬何往乎。嘉耐史克曰。此吾等方欲訪察者。一日不破。誓不自止。將軍溫言曰。高義可感。老夫乃不知所以爲辭致謝。嘉耐史克笑曰。此吾醫人分內事。何足掛齒。將軍曰。醫人之弗克盡其職者多。誠篤如足下有幾人。此老夫所以銘心鏤骨感激不忘也。若二人晨興而出。宜饑矣。盍進早餐乎。吾應曰。唯。因共入食時。嘉耐史克言將盡此日之功。爲媚拉診視其目。已卽乘夜車行。媚拉意殊不舍。曰。何遽言別。阿父。幸爲兒尼之。勿聽去。嘉耐史克君之來。本爲診我。今遽爾言去。一何忍也。嘉耐史克曰。下走之行。良非得已。密司能聽其歸。卽如膺重賜。於密司亦未始無益。居此殊無能爲。媚拉曰。卽不能有補吾目。亦可小住數日。與朗納遊釣爲樂。此間可以娛

人心懷者良多也。嘉耐史克言。本樂從命。第勢迫不可已。不能不去。媚拉不顧。堅留不釋。嘉耐史克以堅却女子之請爲無禮。無已。允之。請終此星期而後去。媚拉喜吾新友。吾滋以爲樂。前日對奧而佛雷。殊多羞怯。今於嘉耐史克。乃如夙稔。豈媚拉之好惡有不同耶。抑二人實使之如此。非我所知。後此媚拉告我。謂聞其聲音。卽知其人品良善。故喜之。媚拉忽問嘉耐史克與其妹氏年歲相差甚遠否。嘉耐史克詫曰。幼者果與我相差甚遠。密司何從知。曰。徵自君言耳。吾笑曰。爾輩似皆擅偵探之術。此世界似一變爲偵探之世界矣。嘉耐史克既允小住。吾遂假櫻格士之自由車。詣格蘭奈爾。發電致戴尼士曰。星期一之晨。遲子於摩勒車站。請卽電覆。又寄兩畫圖之信片致陶梅及傑克。祝以順適。並自陳不能卽投行伍之故。吾專戴尼士之電。不作迫遽之言者。恐滋人疑惑。吾在將軍宅中作客。而發電數百人。事良可異。必招謠詠。故平淡其詞。既發電。則乘自由車遄歸。媚拉尙與

嘉耐史克聚談。吾乘此趨與老將軍語。將軍在書室中。吾入面後。問曰。丈亦欲一觀吾等今晨覓得之物也否。曰。孺子。固所欲也。請偕爾去觀之。吾曰。今茲有一事。宜先得丈相許者。將軍訝視曰。何事也。吾曰。媚拉之目。雖未復其明。果欲嫁者。丈立可之。吾年中少有所進。是丈所知。足敷我二人居處倫敦所需。若居此間。則更綽有餘裕。媚拉果長誓不可復明。則我願長爲任將護之責。近丈而居。吾雖業律。然尙能爲新聞記者之事。生計前途。或無足憂。丈年高。方自顧之不遑。何暇將護媚拉。我故思之。宜我任此責也。將軍加手吾肩。歡呼曰。佳哉。朗納。若爲是言。使我欣樂無藝。任爾二人何時成婚。吾絕不以爲忤。渠愛爾甚。其心惟貯爾。而我亦深愛爾之爲人。所難者。惟困於財。吾家非富裕。非國家年給以俸。則我或不能安然居此先人所遺之故宅。吾貧固矣。然深欲吾兒少享安樂。今我二人宜少事積蓄。供彼嫁時資。孺子。可與我分手。此時吾心中爲私難充斥。舉國家爭戰之事。盡忘。

之。因與老將軍同詣朝來察訪之地。使吾等之目而明練者。此行必有所獲。顧乃了無所覩。歸時行經一處。若有人刈取灌木雜草甚多。老將軍俯視斷根殘莖。戚然搖首。其意非有愛於此。而吝其見取於人。似此野草雜木。遍生數十里。殊非貴品。所不樂者。則外人過此而留形跡。故對之不快。吾念此物何處無之。村居之人。有需於此者。但啓己家門。伸手可得。何必遠取於此。異而問曰。誰則爲此者。曰。當爲休假作村遊之人耳。若輩賃居村中。時出遊行。以爲外間之灌木有勝所居門前者。故常採取而歸。或供薪火。此輩大招人厭。吾深願其家居無出爲佳耳。吾又指海灘舟迹示將軍。且告以嘉耐史克揣測之說。將軍曰。嘉耐史克誠智人。明警不可及。惜非養生之道。凡用智深者。其體每不健。頗非吾所喜。然近世好尚如此。孩提亦讀偵探故事之書。吾又何禁。歸後。將軍猶嘖嘖稱道嘉耐史克明智不已。媚拉尙與嘉耐史克相聚笑談。嘉耐史克舉其往日所診病人之軼事告媚拉。以

資笑樂。見吾等歸。起而趨迎。老將軍問之。則答曰。有一事可以自信者。誓必解此中奇祕。若悉密司所以致瞽之由。卽能以其道而復其明。吾說似誕。實至顯易。無難明。吾治此事。所獲之奇。將有非他醫所及夢見者。密司之瞽也。了無苦痛。足徵內部無所損。雖不爲療。後此亦能漸次痊復。此可以理揣而得。第吾非謂待其自痊也。宜助以人力。得從事此症。誠畢生大幸。君等外出。有所探覓乎。將軍曰。然。我等所覩者。於君必深有所見。而我固茫然也。昔在軍中。固亦嘗爲斥候。然安可及足下。嘉耐史克曰。有所得乎。吾曰。有之。第殊不足道。將軍謂是遊人採取灌木耳。嘉耐史克立應曰。此大足爲吾助。遊人何似。吾曰。未之見也。第見採割之遺跡耳。割取之痕尙新。然非甫割者。將軍疑而目我。似疑我亦習爲反乎養生之偵探術。嘉耐史克喃喃曰。新而非甫割者耶。彼胡取於此……噫。得之矣。爾時吾等已行近楊臺。媚拉聞聲問曰。若等喧論何事。吾曰。愛者。少頃告汝。蓋嘉耐史克猶未畢。

其說。乃續言。一若直達其思想於言語。曰。此殊顯而易見。其人以小舟近岸而登。刈取灌木挾諸腋下。見之者。以爲所挾灌木而已。旣盜囂爾吐。則隱之灌木中。仍挾而去。卽遇人。亦無能察其隱計。慮亦周矣哉。吾指駁曰。其人不已卸其水靴耶。安有跣足而遊行村野採取草木者。若爲人見。將無啓疑。曰。爾時天已垂暮。人固莫辨其爲跣否也。老將軍曰。其人究安自來。彼乘舟至此採取灌木。復挾以歸舟。有見之者。必以爲異矣。舟所從來。至遠之處。亦不過那棣克或士凱伊。然彼間初非不毛之地。雜草灌木叢生。一如此處。嘉耐史克愀然吁曰。將軍之言良不謬。忽有人曰。吾知渠所自來矣。言者爲媚拉也。雖音吐平靜。吾等皆爲愕然。齊問曰。何自來也。曰。來自一快艇耳。

第十章

我等聞媚拉言。遂四出訪問。而昨夜竟無人見有快艇停泊岸次。雖有一二小舟

行經霍納河口。然是皆村中居民者。非我等欲得之舟也。因復與嘉耐史克詣藥磯。亦無所獲。吾謂之曰。嘉耐史克。若宜慎。此間可危。或足瞽爾。吾弗能聽爾冒險而前。佇立少遠爲是。嘉耐史克曰。子獨不自危耶。吾曰。我縱自陷於危。亦分所當爾。若君以局外人爲我等助。因而獲禍。於理爲不當也。曰。君言一何妄。爾我同爲局中人耳。我欲解揭此案之殷。其心一如爾。何故見外。雖然。無論爲爾爲我。僉宜審慎。而爾尤宜善自防護。若爾而瞽者。密司麥來德將爲之奈何。吾曰。我固無妨。第亦不能不感君善意。決不走險自危。曰。若不走險自危。則胡爲故故臨此危地。此河流寧非大可危者。吾曰。君謂危在河流耶。我等非已共認媚拉之禍。爲人力所致者耶。果爲人力所使然。則安往而不危。乃必危在此河流也。曰。雖然。密司麥來德之遭難。固在此地。此毒物之勢力。異日或無往而不及。遍布全世。第以吾等所知。此時此地爲尤危耳。吾曰。吾等既不知所以禦之之道。宜毋挺身輕試。且遲

之岸旁。或亦有所覩。君留此。我請赴中流。報告所見。嘉耐史克亟呼曰。此烏可。若赴藥磯者。請同往。或我一人獨前。而子留此。我一身而外。無所繫罣。不幸而遭殘。亦無妨事。吾深感。顧終拒其請。於是同坐溪畔待之。嘉耐史克出時計審視曰。已四時二十分矣。若有異者。宜卽作於此頃刻間。吾曰。媚拉之遭禍。將軍之覩怪。同在此際。意其或偶然歟。胡爲此綠光之異。必作於四時至五時之間也。嘉耐史克曰。此異物究未爲人見。密司麥來德所見者。僅綠光一瞥。未能細審何狀。老將軍則但覩藥磯變色而動。是特其間接之狀態。綠光之狀已爲吾人知者。祇此而已。今日所見。或非如此。吾曰。若能預測其狀。寧不大佳。曰。固也。子曾於四時至五時之間。在此見有異於他時者否。吾曰。無之。四五時之間。在此殊樂。似勝於他時。至媚拉遇難之日。始覺其異耳。嘉耐史克曰。四五時之間。在此。胡得勝於他時。吾曰。夕陽方滿照。故覺其佳也。吾言甫畢。嘉耐史克忽大呼躍起。吾駭愕欲絕。呼問何

事曰。太陽也。伊華德。太陽也。言已。突攫吾手中雙管遠鏡。逕奔坡下。其處適當溪之上流。吾愕視移時。遽起追逐其後。嘉耐史克回顧見我。則大呼曰。止。止。卽止爾足踐之處。毋隨我後。吾從其言。止立。深信其人必不我欺。決非舍我而隻身赴險。且囑我駐立。當有用意。想不使我束手而無所事也。嘉耐史克奔趨將及藥礮。相去尙數尺。忽止不前。坐一礁石上。徐出紙煙然吸。吾見狀益大異。莫解。驚詫少定。始呼問何事若此。嘉耐史克笑答曰。無他。吾思自此一覽景色耳。言已。舉鏡就目。先向將軍所居。旣而面海。吾乃恍然知渠方覓海中快艇。蓋此適其時。彼詭祕之艇宜以此時出見海中。則問曰。觀快艇乎。曰。無之。一無所觀。唯見一明輪之船。似遊船者耳。吾曰。是宜爲格蘭柯。自摩勒載游人。無與吾事。曰。誠然。此舟拙薄。以狀觀之。似僅能自顧。力不足以保其乘客。若在風雨不靖之天。吾雅不欲以身輕託於彼。可危也。嘉耐史克據坐崖上。去我僅數碼。語言尙可聞。無須大呼。吾自審呆。

立無所事。則問曰。請隨君登。曰。否。駐立須臾。吾卽下矣。吾曰。可。爾囑我立。久立亦無妨。爾所據可以縱觀。居此則一無所覩。雖然。吾固能安之。毋以爲慮也。因就坐一石。納煙斗中而吸。以待其下。吾心悠然漸歸宅中。縈思媚拉不已。忽聞嘉耐史克相呼。駭然躍起。應曰。何事。曰。若覺有異否。吾曰。無有。言甫已。斗覺耳內奇鳴。脈息奮疾。語音亦滅。噤不成聲。仰視嘉耐史克。嘉耐史克立懸崖上。向我招手。爲狀甚險。第見其脣動。不聞何語。吾心狂躍。若與胸膛相撞擊。迴首四顧。絕不見可異之物。而喉間若有扼之。使不得呼吸者。鬢角之際。亦若有汽機之椎。大擊不已。復視嘉耐史克。則已自崖坡上攀拾而下。復止立向我招手。吾見其脣動。仍無所聞。因自思病矣。是必數日來憂勞逾度。神經受病。故有此狀。嘉耐史克當扶我歸屋。偃息少時卽愈耳。然胸中血管漲甚。嘉耐史克弗速前相救者。迸裂而死矣。又覺胸部忽然漲大。巨倍於常。嘉耐史克去我愈遠。望之如黑星一點。耳鳴益厲。澎湃

若波濤。則自告曰。此瀑布之聲耳。何懵懵至是。並此而不解。偶作小恙。少須即愈。不足憂也。然嘉耐史克不速來則死。此時呼吸已窒。仆倒地上。顧視嘉耐史克。去我仍遠甚。似止立不之動。我病固不足憂。而媚拉知狀。爲之奈何者。遂匍匐起。呼曰。速來。吾病矣。此語但構之心中。乃不能發爲言語。語亦無聲。而喘促特甚。又竭力大呼。卒不成言。抑言之而不自聞。然則非暗即聾矣。覺膝搖不定。河水繞我身而迴旋。樹木亦隨河流而轉動。有一樹與我相摩而過。不可自支。仆倒草叢上。而千萬巨椎。復突擊吾腦。

第十一章

吾既甦。自顧乃枕嘉耐史克之臂而臥。衣領悉解置地上。自首及肩。皆濡於水。嘉耐史克吁氣曰。噫愈矣。伊華德。少須即可如常。且安息毋慮。吾問曰。我何在此。此時自聞其聲。大喜異。亟起坐。呼曰。天乎。吾自謂暗矣。曰。若宜閉目靜息。毋自擾其心。

少須當以語子。吾曰。可。請授我煙管。當從子言。嘉耐史克大笑曰。人能索取煙管者。則去死若暗已遠。宜無恙矣。因取煙管於吾衣囊授我。我雖去死若暗已遠。而自覺甚異。暈眩擾亂。莫可名狀。以爲得煙管。即可自靖其神思。因安臥吸煙良久。又覺長作是狀。亦殊足自適。旣而頗自悵作此病狀。言曰。頃者我得無暈昏。生平初未嘗有是也。嘉耐史克曰。吾固亦知爾未嘗有是。人生一遭亦已足矣。深願爾後此勿更有此。茲事未得了解者。不宜更引身近此溪流。非兒戲也。吾曰。若謂吾身臨是地。有所觸感。遂動其神經耶。意或然也。曰。若已覺適然。能舉頃者之狀相告否。抑歸後言之乎。吾曰。無妨。卽言。歸後不宜提及。彼父女聞之。恐益增憂。遂以頃者所覺之狀語之。嘉耐史克曰。其始來以何時。吾曰。聞君呼我。我躍起應之。時此究爲何。曰。能起而首釋吾臂乎。而後徐論。吾臂酸疼欲折矣。吾方憶尙枕其臂。急舉首釋之。自笑曰。吾何憤憤。竟自忘所枕爲君臂矣。嘉耐史克得釋其臂。亦

出煙管然吸。言曰。今可開始論議矣。若尙省我胡爲忽舍子而趨奔崖上乎。曰。省之。子似謂太陽之光。言竟卽疾趨去。嘉耐史克曰。實相告。若等謂藥礮能行之說。吾殊未深信。繼聞子言每日當此之際。河流盡傾趨此石。而夕陽之光。又適滿被其上。於是始有所疑。方子爲此言告我時。忽憶爲時已屆。宜登崖上一覓彼快艇。吾覺此快艇之與石礮。若有相連屬。胡爲而作此想。亦不可自明。登崖四矚。久之無覩。至呼語爾時始有異。吾自遠鏡外觀。自海及岸。由水步至於晨來吾等訪覓之小灣。斗見石影均作奇綠。一瞬輒復其原。吾駭曰。又作綠色耶。嘉耐史克。子能明其故也否。吾乃大誤事。方其時。吾正宣有助於爾。而忽爾病暈。天乎。是果何物也。嘉耐史克冷然曰。今日所遭。不特使我無進。且有退矣。吾曰。何謂有退。吾誠不解。曰。請以我之見解相告。我自謂適當不訛。然此奇事。吾何敢臆斷。吾曰。事固奇。盡畢子說。曰。伊華德。我初意茲案若塌底澄清。則必有無線電機在其內。意或有

科學家發明新式之無線電機。吾等偶當其電路。故遭此種種。信然者。密司麥來德及其犬露爾吐致瞽之故。亦不難明。而露爾吐之見盜。亦有以故矣。彼科學家者。聞有當其電而失明者。深恐人知而阻撓其功。故取之去。快艇之來。亦至中吾說。顧此意。今已漸滅如泡影矣。吾曰。何也。子似生而思力過人。今治此。亦一憑其思想。倏而是。倏而非。其人太智。自擾反甚。爾殆因綠光出見時。不覩快艇。遂自疑其說爲訛耶。吾謂子說確當不謬。若弗能爲我解其故者。我終不謂其訛。雖然。以我爲人。危未及身。卽已暈倒如婦女。其唯否。又何足爲子輕重。非子之奔救。或尙挺臥於彼。所遭不止此而已也。嘉耐史克目我深思。莊容搖首曰。伊華德。吾實以子故。遂自非其說。吾曰。何謂也。豈子爲我之昏暈而遽易其意耶。曰。吾子自謂昏暈。其實何嘗有此。非昏暈。我若不見而奔救。將永無甦醒之時。吾詫曰。乃不謂之昏暈耶。誠不知君醫人何以名此。此女娃之態。醫人之所以名稱之者甚夥。吾自